

**Sing vooraf staande: Psalm 20:1, 5 (p. 90)**

- 1 O, mag die HERE u verhoor / in dag van nood en stryd!  
En mag die Naam van Jakobs God / u dek in oorlogstyd!
- 5 Ons wil oor u oorwinning juig – / die vaandels jubel mee!  
Ons loof die Naam van onse God. / Mag Hy u wens u gee!

Ons hulp is in die Naam van die Here wat die hemel en die aarde geskape het.  
Geliefdes, genade en vrede vir u van God ons Vader en die Here Jesus Christus deur die  
kragtige werking van God die Heilige Gees.

**Amen.**

**Lofpsalm 66:1, 8 (p. 320)**

- 1 Juig, aarde, juig met blye galme, / laat jubels opstyg uit die stof!  
Sing tot Gods eer jul dankb're psalme, / en maak Hom heerlik in jul lof.  
Sy grootheid ken geen maat of perke, / geen grens is daar vir sy gesag;  
die vyand sien met skrik sy werke / en buig hom kruipend voor sy mag.
- 8 Was ek deur ongeregthede / en hul aanloklikheid bekoor,  
dan het die HEER na my gebede / en jammerklagte nie gehoor.  
Maar Hom, die kenner van die harte, / was ook my diepste wens bekend;  
Hy het gehoor, en in my smarte / die oor na my gebed gewend.

**Gebed**

Amen.

**Psalm 9:7 (p. 37)**

- 7 Die hart van hul wat U bely, / sal in u Naam standvastig bly.  
Dié wat U soek in stil vertrou, / is by U veilig en behoue.

**Skriflesing: Jeremia 9**

**Teks: Jeremia 9:24; Kategismus Sondag 47**

**... maar laat hy wat wil roem, hom hierop beroem dat hy verstaan en My ken, dat Ek die HERE is wat goedertierenheid, reg en geregtigheid op die aarde doen; want in dié dinge het Ek 'n behae, spreek die HERE.**  
(Jeremia 9:24 AFR53)

Die eerste ding wat ons baie duidelik vir onself moet kry, is dat daar 'n baie groot verskil tussen ons natuur en die natuur van die Here is.

- Adam het byvoorbeeld in opdrag van die Here vir die diere name gegee. Kom ons sê dit effens anders: Hy het vir dié dinge name gegee wat deur die Almagtige geskape is.
- Deur dit te doen het hy elke keer die openbaring van die Almagtige God voor hom gesien, en moes hy dit aanbidkend benoem.
- Net dit wys al hoeveel ons kleiner en swakker as die Here is.
- Die Here se Naam is sy Wese – en in die ou tyd was hulle bang om die Naam van die Here te sê uit respek vir sy grootheid.

Dit bring ons by die vraag: Hoe kan ons, die onheiliges, God wat ewig heilig is, met woorde of aanbidding eer? Job het eenkeer 'n soortgelyke vraag gevra:

**Kan 'n man aan God 'n diens bewys? Nee, aan homself bewys die verstandige 'n diens. Het die Almagtige daar belang by dat jy regverdig is? Of is dit voordeel vir Hom dat jy onberispelik wandel? (Job 22:2-3 AFR53)**

Ons gee in hierdie preek aandag aan drie sake:

1. **Die werk van die engele**
2. **Die gebed van die gelowiges**
3. **Die Here Jesus Christus en sy liefde vir ons**

### 1. Die werk van die engele

Daar is iets wat die engele doen, wat ons almal wat eerlik aanbid, graag wil doen.

- Dit is om die Here te aanbid en te verheerlik soos wat dit behoort gedoen te word. En seker nog belangriker – omdat dit werklik spontaan en uit die diepte van ons harte kom. Dit is presies waar die eerste gebed van die *Onse Vader* inpas:  
**Laat u Naam geheilig word.** (Matteus 6:9 AFR53)
- Die engele wat nie saam met die Satan in sonde geval het nie, is bekwaam om die Here volmaak te dien en te aanbid.
  - Hulle hele voortbestaan bestaan daarin.
  - Hulle het natuurlik toegang tot die volmaakte hemel waar God se troon is.

Wat moet ons doen wat hulle doen? Kom ons kyk wat staan in die Bybel.

- Ons moet by die Heilige God smeeek dat Hy ons heilig maak sodat ons kan verstaan wat ons moet doen om Hom te heilig, maar ook sodat ons in staat is om die regte dinge te doen waarmee ons Hom eer.
  - Die Here gee aan ons die opdrag om heilig te wees. Dink maar byvoorbeeld aan Levitikus 19:2 (AFR53):  
**Spreek met die hele vergadering van die kinders van Israel en sê vir hulle: Heilig moet julle wees, want Ek, die HERE julle God, is heilig.**

Die engele het dieselfde opdrag. Daarom is almal van hulle wat teen die Here in opstand gekom het omdat hulle sy heiligheid vir hulle wou hê, uit die hemel uitgewerp.

- Die wat nou daar in die hemel is, prys God dag en nag. Die Here sê van hulle:  
**Loof die HERE, sy engele, kragtige helde wat sy woord volbring, in gehoorsaamheid aan die stem van sy woord!** (Psalm 103:20 AFR53)
- Logies is dit wat ons ook moet doen: Ons moet in die Here bly wees en juig; ons moet psalmsing tot eer van sy Naam, die Naam van die Allerhoogste (Psalms 9:3).
- Die Here gee ook vir ons presies hierdie opdrag:  
**Want julle is duur gekoop. Verheerlik God dan in julle liggaam en in julle gees wat aan God behoort.** (1 Korintiërs 6:20 AFR53)

Kom ons vat dit saam: Ons en die engele is almal skepsele. Ons is almal geskape tot eer van die Here en ons moet die lof aan die Here saam uitjubel. Jesaja het by die Here die genade ontvang dat hy eenkeer gesien het hoe dit in die hemel gebeur. Hy het gesien en gehoor hoe die engele die een die ander toegeroep en gesê het:

**Heilig, heilig, heilig is die HERE van die leërskare. Die hele aarde is van sy heerlikheid vol!** (Jesaja 6:3 AFR53)

## 2. Die gebed van die gelowiges

Ons weet mos hoe is ons! Dit is mos nie sonder rede dat ons in ons belydenis sê dat ons van nature geneig is om God te haat nie!

- Ons het nie vanself lus om die Here te aanbid nie. Maar dit is verkeerd dat dit so is en dit moet verander.
- Soos die engele moet ons ons lewe en ons saligheid vind in die lofprijsing aan God. Dink aan die bekende woorde:

**U is waardig, o Here, om te ontvang die heerlikheid en die eer en die krag, want U het alles geskape en deur u wil bestaan hulle en is hulle geskape.**

(Openbaring 4:11)

Al is ons op die aarde, ons is deur die Here Jesus Christus verlos van ons sondes.

- Daarom word die mense wat werklik in God glo, deur die Heilige Gees gedryf om te bid dat die Here se Naam in hulle lewens geheilig moet word.
- Elke mens wat sy sonde en die nood om daaruit verlos te word, verstaan, het net hierdie begeerte in sy hart dat hy vernuut wil word. Hy wil nader aan die Here wees en Hy wil die teenwoordigheid van die Here al meer in sy lewe belewe.

Dit is hoe dit met ons moet wees. As ons bid dat die Here se Naam geheilig moet word, is dit nie in die eerste plek 'n belydenis of 'n verklaring nie:

- Dit is 'n smeekgebed waarmee ons voor die Here gaan staan en pleit dat ons deur Hom verander moet word, sodat ons nader na Hom toe groei en Hom meer en beter met ons hele lewe kan verheerlik.
- Hoe heiliger die Here se Naam in my lewe is, hoe meer kan ek Hom dank omdat Hy my van my sondes verlos het.
- Maar terselfdertyd kan ek ook meer in gemeenskap met Hom lewe.

Hierdie gebed dat die Here se Naam in my lewe geheilig moet word, is natuurlik ook 'n voorbereiding op die ewige lewe.

- Dit is juis omdat ons weet dat daar 'n lewe na hierdie een is dat ons beseft dat ons net daar kan kom as die Here my daarvoor voorberei. Hy laat ook net diegene daar toe wat Hom regtig geken en aanbid het.
- As gevolg van my sondes kan ek Hom nie spontaan en reg aanbid met alles wat ek doen nie, en daarom moet ek altyd aanhou bid: *Laat u Naam geheilig word*, want ek wil die Here reg ken, en ek wil Hom prys wanneer ek Hom aanbid.
- Vir 'n ware gelowige is dit die lus van sy siel.

Ons roep ook uit saam met Deuteronomium 32:3 (AFR53):

**Want die Naam van die HERE roep ek uit: Gee grootheid aan onse God!**

## 3. Die Here Jesus Christus en sy liefde vir ons

Die Here Jesus het in sy hoëpriesterlike gebed iets gesê wat by elkeen van ons moet vassteek:

**En dit is die ewige lewe, dat hulle U ken, die enige waaragtige God, en Jesus Christus wat U gestuur het. (Johannes 17:3 AFR53)**

Dit is waaroor alles gaan. Jesus Christus wil ons in die ewige lewe hê. En al manier hoe ons daar kan kom, is as ons die Here ken in die geloof.

- Daarom kom Hy aarde toe en sterf tot versoening van ons sondes sodat die versperring van die sonde weggebreek kan word.
- Nou kan ons God weer ken, want die versoening van die Here Jesus Christus maak dit moontlik, want die doel van sy koms was om ons te verlos en om ons van ons verlossing te verseker.

Een van die dinge wat gebeur het as gevolg van die kruisiging van die Here Jesus, is dat die Heilige Gees oor die kerk – dit is ons – uitgestort is. Nou lei die Heilige Gees ons om te bid en ook met wat ons moet bid.

Die inhoud van die gebed is dat God ons wat onheilig en skuldig is in staat stel om Hom te kan aanbid soos wat dit behoort gedoen te word omdat ons weet wie Hy regtig is.

Dit is belangrik dat ons moet weet dat ons hierdie gebed nie oor selfsugtige redes moet bid nie.

- Met ander woorde ons moenie net bid vir ons eie verlossing en ons persoonlike verhouding met die Here nie, al gaan dit natuurlik ook daaroor.
- Maar dit is ook so dat daar van elkeen van ons 'n kragtige getuienis moet uitgaan na alle mense in die wêreld toe sodat hulle kan weet wie die Here is.

Natuurlik is dit so dat almal wat ons getuienis hoor en wat sien hoe ons die Here aanbid, nie tot bekering kom nie.

- Maar dit is ook so dat hulle in die eindoordeel voor God gaan staan, en dan gaan die Here ons getuienis gebruik om hulle te veroordeel:
  - Hulle moet by ons sien en hoor van God sodat hulle hulleself nie eendag in die eindoordeel kan verontskuldig omdat ons nie ons roeping en ons getuienis teenoor die Here nagekom het nie.
  - U sien dit is baie belangrik dat ons die krag van die Here Jesus se genade aan die hele wêreld openbaar.
  - En omdat ons dit nie vanself kan doen nie, bid ons dat God die Vader ons sal help om dit te doen omdat Hy self sy Naam in ons lewens heilig maak.

Ons onthou mos wat daar in Matteus 25:31 staan:

**En wanneer die Seun van die mens in sy heerlijkheid kom en al die heilige engele saam met Hom, dan sal Hy op sy heerlike troon sit; (AFR53)**

- Kom ons wag ons Here in met die wete dat God sy Naam onder ons heilig maak, sodat ons in die heerlijkheid van Christus kan deel.
- Dit vra natuurlik dat ons elke dag 'n bekeringslewe sal lewe. Al is dit moeilik, die engele hou ons dop. Die Here sê van hulle:

**So, sê Ek vir julle, is daar blydskap voor die engele van God oor een sondaar wat hom bekeer. (Lukas 15:10 AFR53)**

Ons het 'n baie groot troos, en dit is dat ons weet dat die Here in sy genade maak dat ons tot bekering kom waar ons sonde doen. Hy maak ook dat ons Hom kan ken, al is ons eie natuur nie daarop ingestel om die Here te ken en te aanbid nie. U ken mos die bekende woorde in Jeremia waar die Here belowe het dat Hy ons self sal verander:

**Maar dit is die verbond wat Ek ná dié dae met die huis van Israel sal sluit, spreek die HERE: Ek gee my wet in hulle binneste en skrywe dit op hulle hart; en Ek sal vir hulle 'n God wees, en hulle sal vir My 'n volk wees. En hulle sal nie meer elkeen sy naaste en elkeen sy broer leer nie en sê: Ken die HERE; want hulle sal My almal ken, klein en groot onder hulle, spreek die HERE; want Ek sal hulle ongeregtheid vergewe en aan hulle sonde nie meer dink nie.**  
(Jeremia 31:33-34 AFR53)

Mag ons ook wees soos wat die Psalmdigter sê:

**My mond is vol van u lof, die hele dag van u roem.** (Psalm 71:8 AFR53)

En ons maak ons roem dit wat ons teksvers sê:

**... maar laat hy wat wil roem, hom hierop beroem dat hy verstaan en My ken, dat Ek die HERE is wat goedertierenheid, reg en geregtigheid op die aarde doen; want in dié dinge het Ek 'n behae, spreek die HERE.** (Jeremia 9:24 AFR53)

Kom ons lees saam wat ons belydenis van al hierdie dinge leer in die Heidelbergse Kategismus Sondag 47:

**Vraag 122: Wat is die eerste bede?**

*Antwoord: Laat u Naam geheilig word. Dit is: Gee allereers dat ons U reg ken (a) en dat ons U heilig, roem en prys in al u werke waarin u almag, wysheid, goedheid, geregtigheid, barmhartigheid en waarheid so skitter (b). Gee verder dat ons ons hele lewe, gedagtes, woorde en werke daarop sal rig dat u Naam nie om ons ontwil gelaster nie, maar geëer en geprys word (c).*

*(a) Joh 17:3; Jer 9:24; 31:33, 34; Matt 16:17; Jak 1:5; Ps 119:105. (b) Ps 119:137; Luk 1:46, 47, 68, 69; Rom 11:33. (c) Ps 71:8; 115:1.*

**Amen.**

Slotgebed

Slotpsalm 145:1, 2 (p. 696)

- 1 U Naam, o HEER, so hoog in heerlijkheid, / wil ek verhef vir ewig en altyd;  
u Koningseer wat alle krone oorstraal, / wil ek verhoog in onvermoeide taal.
- 2 Die HEER is groot, daar is geen sanggeluid / wat ooit sy lof in volle waarde uit!  
Dit is 'n see waar niemand in kan meet, / dit is 'n vloed waar ons geen grond van weet.

Die genade van die Here Jesus Christus en die liefde van God en die gemeenskap van die Heilige Gees bly by u almal.

**Amen.**

Dr MJ du Plessis  
Hulpdienspredikant  
Gereformeerde Kerk Clanwilliam  
Datum: 2 Maart 2014